

科為果相。明二種涅槃。顯是如來入滅之相。人多不曉。或謂先寂定。後說法。或云於無記中。假名字說等。如是妄傳。深乖經旨。

△_{巳六}分別總相功德。

分別總相成就畢竟功德者。分別人法。二位差別故。人位差別者。上首眷屬差別故。如經。為諸弟子故。法位差別者。世間出世間法等故。如經。略說法要故。

六分別總相者。人法是總相。各有二別。故云分別。人中如目連身子等。名為師首。名上首弟子。即諸上首。所有徒眾。名眷屬弟子。法中世出世者。如前已解。

△_{丙三}修習世間功德分二。_{丁一}結前標後。_{丁三}牒文解釋。今初

已說序分。次說修習世間功德分。此功德有三種。一者修習對治邪業功德。二者修習對治止苦功德。三者修習對治煩惱功德。

第二分下。即入正宗。修習世間功德。下列三科。即是三道。今修對治。破此三道。離四趣苦。位在兩凡。故名世間。若論斷證。為道方便。聖道基本。則為出世功德矣。

△_{丁二}牒文解釋三。_{戊一}對治邪業。_{戊二}對治止苦。_{戊三}對治煩惱。初中二。_{巳二}標章。_{巳三}牒釋。

今初

對治邪業功德者。

△^{己二}牒釋四。^{庚一}依根本戒。^{庚二}方便遠離戒。^{庚三}二戒能生功德。^{庚四}勸修利益。初中二。^{辛一}舉經。^{辛二}釋義。今初

經曰。汝等比丘。於我滅後。當尊重珍敬波羅提木叉。如闇遇明。貧人得寶。當知此則是汝大師。若我住世。無異此也。

△^{辛二}釋義三。^{壬一}釋比丘。^{壬二}釋滅後。^{壬三}釋木叉。今初

論曰。此修多羅中。每說比丘者。示現遠離相故。復示摩訶衍方便道。與二乘共故。又於四眾。亦同遠離行故。

初治邪業根本戒中。初釋比丘。言每說者。通指一經。列比丘處。例同此釋。文有三句。初云。示現遠離者。比丘三名。初翻怖魔。怖四魔故。^{一五陰。二煩惱。三死。四天。}二云乞士。捨憍慢故。三云破惡。除業惑故。此三名義。皆遠離相也。次云摩訶衍。此翻大乘。方便道者。謂諸菩薩。志願雖殊。而入道階漸。並同聲聞。皆修遠離。故云與二乘共也。後云四眾者。天人龍鬼。謂在家二眾。龍天八部。亦皆厭世。同修出離。已上三句。包攝涅槃會中。大小道俗。人非人類。無不備足。

初句。即當教道眾。次句。大乘菩薩眾。後句。人天雜眾。欲明比丘之號。不局聲聞。取其所修。皆受斯目。方顯遺教。普被群機。故知此經。在聲聞則為本教。在菩薩則為方便道。論從大判。前偈甚明。始見論家。毫髮無濫。豈有聖師。不辨大小。由來傳述。任情妄判。或判為大者。則不曉經文。或判在小者。則全迷論旨。云云異論。無足敘之。來學聽尋。何由曉悟。嗚呼。

△_三釋滅後。

於我滅後者。此言示現遺教義故。不盡滅法故。

次釋滅後中。二句釋之。初句。點示經題。如前已引。次句。反釋。以云於我滅後。則顯法身。常在不滅。即五百問云。肉身雖去。法身在世是也。

△_三釋木叉三。_{癸一}釋名義。_{癸二}顯功用。_{癸三}示利益。今初

以不盡法。清淨法身。常為世間。作究竟度故。如經。當尊重珍敬。波羅提木叉故。此木叉。亦是毗尼相順法故。復是諸行。調伏義故。依如來不滅法身。自體解脫。說波羅提木叉。

三木叉中。初科為二。初略示。上二句。指木叉法體。不盡法身者。諸佛皆有。生法二身。生身有滅。法身不滅。不滅有二。一本性法身。永無生滅。二修成法身。有生無滅。即戒定慧等。五

分功德。從因至果。聚集為身。今指木叉。即此身也。下二句。明遺囑之意。常為世間者。流及未來。無窮已故。作究竟度者。能使群生。越生死故。此句即示。木叉義也。經中尊重珍敬。四義差別。功德高勝故尊。利益弘深故重。保惜不失故珍。謹奉不慢故敬。波羅提木叉。此翻別別解脫。或云處處解脫者。皆謂過境無量。隨持得脫。又復隨境防護。無非趣果故也。此木叉下二重釋。又二。初會名毗尼。翻律。律即是教。調伏是戒。戒即是行。木叉果號。而諸律中。名通教行。故作此釋。五分律云。分別名句。木叉此即舉果。以目教也。今云毗尼相順者。以果由教剋。故得目教。為木叉也。又四分律云。木叉者戒也。此即舉果。以目行也。今云諸行。調伏義者。由別解脫。調伏羲同。故得目戒。為木叉也。依如來下。次顯體。前示木叉。但云不滅法身。於義未顯。故的指之。謂此木叉。即是果佛。修成解脫功德。還以己證。轉示群生。故云依法身說也。則知所受戒體。全佛法身。所以持之。則功德極深。毀之。則罪報尤重。囑令珍敬。豈不遵承。準知木叉。得名有二。在機則名。別別解脫。前云作究竟度是也。在教則是。自體解脫。即此文是也。

△^{癸三}顯功用。

依此法身得度二種障故。一者有煩惱闇障。二者空無善根障。得度煩惱闇障者。如盲得眼。相似法故。如經。如闇遇明故。得度空無善根障者。滿足財寶。相似法故。如經。貧人得寶故。

次科二種障者。一切眾生。在生死中。具足煩惱。盲無所見。失諸善根。貧無福慧。唯此木叉。能破二障。一能破惡。二能成善。斷惡則業惑俱喪。成善則定慧由生。對合經文。了然可見。

△^{癸三}示利益。

餘者。示現波羅提木叉。是修行大師故。如經。當知此則是汝大師故。又示住持。利益人法相似故。如經。若我住世。無異此也故。

三中餘者。指盡後文。又為二段。初釋師義。師有多別。佛為開法救世大師。和尚。闍梨。受業。教授。悉得名師。今此木叉。軌範群生。依承得度。故彰別號。謂之修行大師。又下次釋。人法相似。人即是佛。法即木叉。以佛在世。專用木叉。軌物安眾。佛雖云滅。此法常存。但使稟承。何殊佛在。方見木叉。住持之益。嗟今道眾。撥棄戒科。謂言通達。無師無法。沉墜何疑。請詳此文。庶幾一悟。

△^{庚二}方便遠離戒三。^{辛一}標章。^{辛二}舉經。^{辛三}釋義。

今初